



Approbationes

Theologicæ Ordinis.

I.

IX commissione A. R. P. Ministri Provincialis
legi Conciones in Dominicas totius anni ab
A. V. P. Polychronio Blest, Ordin. FF. Mi-
nor. Recollect. Concionatore Jubilato, & Al-
mæ Provinciæ nostræ Argentin. Ex-Diffinitore compo-
sitas, in quibus contra universalem animarum hostem
militanti Ecclesiæ fortissima subministrantur arma,
dum ubivis solidissimas, & selectissimas ex S. Scriptura
doctrinas ad erudiendum, & efficacissima ad persua-
dendum argumenta afferunt. Licet ex eis sumere Scu-
tum Fidei, in quo omnia nequissimi tela ignea extin-
guantur, Dogmata enim Fidei, & Sacras Orthodoxæ
Ecclesiæ Sanctiones sanè ubivis tradunt, & explicant.
Præbent Galeam salutis, dum contra prædones, eidem
insidiantes, spirituali munimine tegunt, & recto tra-
mite per aptissima media, salubres instructiones, &
directiones ad eandem tam ducunt, quam aberrantes
redu-

reducunt. Stringunt fortiter gladium Spiritus, quod est Verbum DEI, quo omnia peccatorum monstra trucidant, hæresum spectra proscindunt, &, quidquid distortum est, aut bonis moribus contrarium, viriliter, & vivaciter rescindunt; nimirum vivus est sermo DEI, & efficax & penetrabilior omni gladio ancipiti. An aliò igitur, putas, convenientius Auctor eas titulo condecorasset, quàm Armaturæ Fortium? cùm alias quoque prudentibus viris non placeant phalerata, sed fortia, ut ait S. Prosper Lib. 3. de Vit. cont. c. ultimo. Nec tamen inde credas, in Concionibus istis ullibi deesse, quæ placere & prodesse possit, diversæ eruditionis elegantiam. Quin invenies etiam ex SS. Patribus & Ascetis, Theologia, & Jure alioque ubere doctrinali apparatu abundantiam. Quare illas Luce publica omnino dignas censeo ex Conventu nostro Salisburgensi die 20. Martii 1720.

Fr. Marinus Panger,
SS. Theol. Lector Jubilatus,
Provinciæ Diffinitor.

II.

Secundo hoc Sermonum pro singulis totius anni Dominicis paratorum Volumine rursus fortiter armatus procedit A. V. P. F. Polychronius Blest, Ord. Minor. Recollect. Concionator Jubilatus, & Almæ Provinciæ nostræ Argentinens.

Ex-

Ex-Diffinitor. Illud cùm ex mandato A. R. P. Ministri Provincialis accuratè, sedulóque perlegerem, inveni perutilem è Sacris pulpitis dicendi, docendique methodum, ac doctrinam, non Patrum tantummodò Scripturæque Sacræ sententiis refertam, sed utriusque pariter Juris Decretis, aliarúmque Disciplinarum subsidio abundè munitam. Nec procedit *armatus* tantùm *fortiter*, sed & *disponit omnia suaviter*, fluidâ dicendi copiâ non minùs delectans, quam solidò stringentium argumentorum nervò inflectens legentium animos: Nec enim sola secantis gladii severitas, verùm etiam, inquit Veget. L. 2. de re milit. *plurimum terroris hostibus armorum splendor importat*. Huc igitur, quisquis, *ut bonus Christi miles*, Virtutes seu docere, seu discere; quisquis dedocere aut dediscere vitia percupis; huc oculos, huc manus, huc animum. Habes hîc *Hominis verè Christiani* panopliam. Nec ampliori à me perpoliri encomio *hæc Arma* exposcunt: præterquam enim, quòd in sola vitia sanctùm sæviant, & (quod fori mei est) Fidei, bonisque moribus nihil adversentur, ipsum Opus *Arma Virúmque canit*. Ita sentio ex Conventu nostro Salisburgensi ad D. Virginem assumptam die 26. Martii 1720.

Fr. Guilielmus Thomafo, ejusdem
Ordin. & Provinciæ, in præfato Conventu
p. t. SS. Theologiæ Lector Ordinarius.

)()(

CEN-